

# Gichi-Wiindamaagewinan

Niinwi, bemaadzijig manpii gichi-gamiing, nzaagtoonaanh miinwaa nda-penmandaanaanh ninibiiminaanh wii-bmindamaang nbimaadziwininaang, ndoodenaan miinwaa go kina bimaadziwin etemgak aking.

Mii dash maanda sa ooshme ezhi-migoshkaajikaagoyaang wii-aasamaabanjigaadeg e-aanmendaagwag gikenjigaadewin – aanwi go niibna nso-bboon gaa-wiikjitowaad nonda Zaagignan ooshme niizaangaabwimgadoon. Kiinwi manpii Gichi-gamiing enjbaaying, gaa'ii maanda gda-mno-daapnoziinaanh. Gaa'ii maamdaa ji zhi-naaniibwingiba nibi epiichi miji-doodaajgaadeg dbishkoo go naanh gaa wiikaa daa-shkwaasesnoo miinwaa nda-daaweng nowaach go gkenmang bimaadziwin aawang.

Maanda dash go bgosenjigewin yaamang wii-giizhenindaaming kina gezhtoomgak wii-bmaadziimgak ani-akiiwang, niigaan gka-tkokiimi wii-daapnamang gashki'ewziwin e-yaamang wii-naagdawenmang miinwaa wii-aankinootmang maanda nibi, gdoo-gdoo-Gichi-gamiinginaanh. Waabndamang maanda nibi mino-yaamgak naanaasaab aawan gegiinwi g-mino-yaawininaanh miinwaa kina aanike-bimaadziwinan waa-bi-temgak, gnindmigoomi ooshme wii-zgibendmang miinwaa ooshme wii-mshkowendmang ezhi-nagmigoying maanda nibi ani-akiiwang.

Gniigaaninaanaanh dash maanda Gichi-Gamiing Commons Charter ezhnikaadeg, bemaadziimgak debwewini-mazina'igan e-noomikwetaagwak miinwaa e-bgidenimaagemgak wi nibwaakaawin miinwaa Gichi-Gamiing enjbaajig gaa-nagmigaazwaad wii-bminjaadmowaad maanda gnibiiminaanh.

Maanda dash Gichi-wiindamaagewin miinwaa nonda Nitam Inaadiziwinan mooksenoon zhiwe wiiji-nokiimdiwining kina gaataa-gamiing. Maamwi niibna bebenkaan bimaadziwinan gdoo-njibaami. Naasaab dash wii gwa, bezhik inendamowin gda-ashoodenimigonaanh: wii-ni-aanke-zhaaying oodi sa Gichi-Gamiing ogimaakanda'igewin kina nibiin miinwaa bemaadziimgak wii-mnonging.

## Mii dash maanda onji, gda-noomikwetaawmi:

- Maanda Gichi-Gami nibiin gii-miinaawaan bimaadziwin bemaadzinjin miinwaa oodenaawinan mewinza go e ko gikendaagwak miinwaa go daa- aabji-zhichgewag gwa.
- Nonda nibiin, kina bemaadziimgak eteg manpii aking, miinwaa Gichi-Gami oodenaawinan maamwewizinoon miinwaa penmandaadwinoon. Binaachtoong nonda maanzhibijigem.
- Miingwewziwinan aawanoon nonda Gichi-Gamiin miinwaa naagdawenjigewin e-tkonmowaad bemaadzijig miinwaa Gami oodenaawinan aabdeg ji-zhi-aabjitoong wii-mno-ganawaabandjigaadeg wii-zhaabwiimgak pane.
- Nonda akiin gaataaying Gamiing etegin, maanoo da-tenoon, gaa'ii da-daashkigaadesinoon bagwanawaadziwin onji. Kina go naaknigewin e-zhitoong Gichi-Gamiing nji aabdeg ji-towaapa gaagige-min-ayaawin kina gaataaying aking miinwaa go bemaadziimgak kina gegoo akiing.
- Nonda Anishinaabeg mooshkin wii-bminzhaadmowaad bimaadziwiniwaa ezhibiigaademgak gichi-ashodamaagewining aabdeg ji ashoodenjigaadegiba maanda go naanh manpii ogimaakandawichigan.



## Mii dash:

Gdashoodinaanaanin dash gdnwewninaanin noomikwetawmang maanda gichi-wiindamaagewin bgomshkaamgak anji-wiijgaabwitaadwin miinwaa waa-zhi-ogimaakandawichigaadeg gdoo-Gichi-Gami Commons ezhnikaadeg. Gmiigwechwendaanaanh wi nibwaakaawin, naaniibwin miinwaa mshkowziwin maanda debwewini-mazina'igan ge maawnjising wii-izhinaatoomgak niigaan gdoo-Gamiininaanin. Gdoo-bgosendaami miinwaa gmashkowendaami maanda ani-akiiwang miinwaa kina aanike-bimaadziwinan waa-bi-temgak ge dibinawewiziwaad gaa-bi-naaknigeying.

Beshaakbiimang dash maanda Wiindamaagewin, gdoo-minwendaanaanin gashkewizinaanin, bezhigoowi maa ge go maamwi, wii-aankinootmang nonda nibiin miinwaa ani-akiiwang.